

KHAWVÊL SUNDAY SCHOOL NI
NOVEMBER 1, 2020

PUTLING SUNDAY SCHOOL

THUPUI

BIBLE – PATHIAN THU NUNG

Ziaktu
Upa C. Thangnghilhlova



SYNOD LITERATURE & PUBLICATION BOARD

*Published by
Synod Literature & Publication Board
for
Mizo Sunday School Union*

*Chhut khatna – 2020
Copies – 6,500
(All rights reserved)*

*Printed at
Synod Press
Aizawl - 796001
Mizoram*

THUHMAHRUAI

Kum 2020 Khawvêl Sunday School Ni, puitling zir atân MSSU Committee chuan ‘Bible – Pathian Thu Nung’ tih a thlang a. A ziaktu atân Upa C. Thangnghilhlova a ruat a. Ani hi Bible Society of India-a hun rei tak lo thawk tawh, Senior Auxiliary Secretary thlenga kaisâng a, tûnhnai maia pension-a chhuak ta a ni. Chutianga tawn hriat ngah leh hun rei tak kohhran enkawl hnaa lo inhmang tawh a ni a, a thu ziak kan zir ho thei tûr hi a lâwmawm hle mai.

Khawvêlin hma a sâwn zêl a, thil thar tam tak a chhuah mêk laiin thil tam tak an ral zêl baw. Hetiang khawvêl danglam reng kârah Pathian thu danglam ve ngai lo kan nei hi a hlu hle a. Pathian thu hi chatuan daih, danglam ve ngai lo a nih avângin man fuh leh zir chian pawh a ngai hle.

Kumina ‘Bible Pathian Thu Nung’ tih kan zir tûr hi a vânehthlâk hle a, zirtu zawng zawng tân malsâwmna thlentu a nih ngei ka beisei.



(REV. B. SANGTHANGA)

Executive Secretary

I/c MSSU etc.

**KHAUVÊL SUNDAY SCHOOL NI
NOVEMBER 1, 2020**

PUTLING SUNDAY SCHOOL PROGRAMME

CHAWHMA INKHÂWM

Hruaitu : Superintendent
 Ƨantu chhiar tûr : Mt 4:4; 2 Tim 3:16
 Hla sak ho : KHB No. 363
 (Nangma thil ropuite an sawi)

Thilpêk lâk khâwm leh hlan

Thupui sawi : **Bible – Pathian Thu Nung
 Ƨhen I-na**

Thupui sawitu :
 Hla sak ho : KHB No. 5
 (Leilung pian hmainsu chu a awm)

CHAWHNU INKHÂWM

Hruaitu : Asst. Superintendent
 Ƨantu chhiar tûr : Heb 4:12
 Hla sak ho : KHB No. 562
 (Lalpa, I thu hi a hlu ber)
 Thupui sawi : **Bible – Pathian Thu Nung
 Ƨhen II-na**
 Thupui sawitu :
 Hla sak ho : KHB No. 565
 (Pathian Lehkha ka ring e)

*(Khawvêl Sunday School Ni thawhlâwm hi Bial Treasurer
 kal tlangin Synod Office-ah chhûn luh tûr a ni)*

BIBLE – PATHIAN THU NUNG

ṬHEN I-NA

Bible lo pian chhuah dân

1. Thuhmahruai

Bible hi Pathian thu, Pathian thâwk khum, thu nung leh thiltithe i a ni a. Bible bêl Chiangtute chuan a dikzia hi ni tin a tharin an hmu ṭhîn. Bible hi Pathian thu ni mah se mihring kut chhuak a nihna lai pawh a awm. Kum tam tak chhông ziah leh lâk khâwm a ni a. Pathian miten an lo humhalh tlat a ni. Hmasâng aṭanga vawiin thlengin mihring nun kaihruaitu, thu hlu leh rotling a ni. Thu nung a nihna hre Chiang tûr chuan Bible lo pian chhuah dân kan hriat Chian phawt a ngai âwm e. Vawiin chawhmaah hian Bible lo pian chhuah dân kan zir dâwn a. Sawi tûr tam tak awm mah se, a tlangpui Chauh kan sawi dâwn a ni.

2. Thuthung Hlui lo pian chhuah dân

‘Bible’ tih ṭawngkam hi Grik ṭawng *Biblos* aṭanga lâk niin a awmzia chu ‘lehkhabu’ tihna a ni. Amaherawhchu, Grik ṭawng leh nun dân zuitu Juda-te khân Pathian Thu Thianghlim sawina atân an lo hman g tawh a. ‘Lehkhabu Thianghlimte’ emaw, ‘Thuziak Thianghlimte’ ti emawa sawi a ni ṭhîn. Hun lai hâwl (middle age) hun laia Bible sawi nâna an hman uar tak pakhat chu Hebrai ṭawng *miqra* a ni a. A awmzia chu ‘chhiar’ tihna a ni a; Juda-te inkhâwmnaah mipui hmaa Pathian thu chhiar ṭhin a nihzia târ lanna a ni.

Bible-a lehkhavute hi engtin nge sakhaw lehkhabu a lo nih? Engtin nge lehkhabu heti zozai, kum tam tak chhônga ziahte hi a khâwma bu khata pawm a nih? Eng tikah nge? Eng tehfung nge an hman tih te hi zawhna pawimawh tak a ni. Hêng zawng

zawng sawina leh zir bingna atâna thu hman chu *Canon* tih a ni. Canon tih chu Bible atâna thuziak pawm leh pawm loh tûr thliar nâna ‘tehfung’ tihna a ni. Bible pum pui lo pian chhuahna tûra Pathianin kawng thui tak a buatsaih leh kohhran hruaitute finnaa a thuam dân te hi a ropui tak zet a ni. Chu kawng thui tak, harsa tak ni bawk chu engtin nge kan Bible, Pathian thu nung hian a zawh chhoh tih chu a tlângpui lo zir ila.

3. Bible thlit fîma pawm a nihna kalkawng

Kristianten Bible-a lehkhabu pawm chin tûra ngaih hi a inang diak diak lo. Roman Catholic leh Ortodox Kohhran te chuan bu 66 bâkah Apokrifate te chu Bible-ah an telh a. Siamthar Kohhrante erawh chuan bu 66 hi Bible-ah kan pawm thung. Kristianten Thuthlung Hlui kan tih hi Hebrai Bible tiin Bible zirna lamah chuan hriat a ni bawk a. A chhan chu Juda sakhua, Hebrai mite Bible a nih vâng a ni. Hmun thenkhata Aramaik tawng hman zeuh (Gen 31:47; Jer 10:11; Daniela leh Ezra butea lang) tih loh chu Hebrai tawnga ziah a ni. Thuthlung Hlui bute ziah a nih chhûng hi kum sâng chuang tehmeuh a ni a. Hla thu ziah emaw, phuah hmasak ber emaw nia ngaih chu Miriami Hla (Ex 15:1-18) leh Deborah-i Hla (Ro 5) te hi a ni a, kum BC zabi 12-na hun lai vêla phuah a nih rin a ni. Chutih laiin Daniela leh Estheri bute chu Juda saltân hnu lama ziah a ang hle. He hun rei tak chhûng hian bu khata chhuak tûrin lehkhabu hrang hrangte chu lâk khâwm zêl a ni.

Thuthlung Hlui tia kan sawi hi Juda-te Bible ti pawhin kan sawi thei ang. Juda-ten Bible an sawi dân pakhat leh chu TaNaK tih a ni a. TaNaK chu Hebrai Bible then hran pathum sawina hming kaihtawi a ni a. Chûngte chu: Torah (Dân/Zirtîrna) te, Nevim (Zâwlneite) leh Ketuvim (Thuziakte) an ni.

Torah tih chuan Mosia dân lehkhabu pangate a huam a. Hêng hi Mosia ziah nia ngaih a ni ber a. Thu lâkna hnâr hrang

hrang aṭanga lâk khâwm nia ngai te pawh an awm. Hêng lehkhabu panga (Genesis-Deuteronomy) te hi kum BC 458, Ezran Jerusalem a pan hma deuh khân Bible-a pawm tawh nia rin a ni.

Then hnihna Zâwlneite lehkhabu (Nevim) hi a hlâwm lian ber a ni a, Hebrai Bible bu chanve aia tam mah a huam a ni. Zâwlneite lehkhabu hi hlâwm hnih – Zâwlnei Hmasate tih leh Zâwlnei Hnuhnûngte tiin then a ni leh a. Zâwlnei Hmasate hi Torah-a Israel fate chanchin chhunzawmna a ni a, Josua aṭanga tanin Jerusalem Temple tihchhiat hmasak ber chanchin te, Israel lal tâwp dân chanchin te a ni a, kum BC 560 thlenga Babulon sala an tân dân chanchina khâr a ni. Zâwlnei Hnuhnûngte hi kum zabi 8-na aṭanga BC 5-na inkâra Israel leh Juda lalram aṭanga zâwlneite chanchin ziahna a ni ber a. Hêng Zâwlnei Hnuhnûngte hi ‘Zâwlnei Liante’ tih leh ‘Zâwlnei Tête’ tia then hran leh a ni.

Hlâwm thumna Thuziakte (Ketuvim)-ah hian sakhaw lam hla (Sam leh Ṭah Hla) te, hmangaihna lam hla (Hla Thlan khâwmte) te, finna leh inbih chianna lam (Thufingte, Joba leh Thuhriltute) te, chanchin hlui ziahna (Ruthi, Estheri, Ezra, Nehemia leh 1&2 Chronicles) te leh thu inthup puan chhuahna lam (Daniela) te a huam a ni.

4. Bible puah khâwmte hmasate

(1) Samari mite: Samari mite hi Nablus (hmânlai Sekem) rama inkulh niin, lalram inthen hnua hmâr lam lalram Israel thlah kal zêl nia inchhâl an ni a. Ben Israel (Israel fate) tih emaw Shomrim (thutak vawngtute) tih emawin an inko va, Samari mite tiin mi dangte chuan an ko thung. Assuria laltena kum BC 722/721-a Israel lalram an tihram tum pawha him piala chhuak anga insawi an ni. Anni chuan Dân bu pangate chauh pawmin Zâwlneite leh Thuziakte an hnâwl a. Ezra leh Nehemia hun lai

vêl ațanga pêng hranga inla hrang an nih vânga Bible bu pum hi nei kim ve ta lo nia ring an awm.

(2) Qumran-a mite: Tuipui thi hmârthlang lam, Khirbat Qumran (Khirbat Kumran) an tih hmuna chêng, inla hrang, Essene (Esin) pâwl nia rin te chuan pûkah Bible lekhazial thahnem tak an lo hnutchhiah a. Zial 500 chuang ngawt laih chhuah a ni. He laia chêngte Bible hmuh chhuahah chuan Estheri bu tih loh Hebrai Bible-a bu awm zawng zawngte chu hmuh kim vek a ni. Qumran mite hian Thuthlung Hlui bute hi an lo pawm deuh vek ni ngei tûr a ni.

Qumran pûka chêngte lekhahu dang ‘Inkhuahkhirhna lekhahu’ an tihah chuan zâwlneite lekhahua thu eng emaw zât a awm a. Hmun hrang hrangah Sam bua thute zeh tel a ni bawk. Thuthlung Hlui bua thu awmte nê n inang diak diak lo mah se, thu tam tak chu Bible-a mi nê n a danglam tîem hle a ni. Chuvângin, Qumran-a inkulh hrangte khân Bible bu pawm ngheh an lo nei tawh ngei a ni tih a hriat theih. An Juda unaute (Palestina Judate) pawm dân nê n pawh a thumun viau niin a lang.

(3) Alexandria-a Juda-te: Alexandria khawpuia Grik nun dân laa an ățawng hmang Juda tam takten anmahni puala Pathian thu zirna leh inkhâwmnaa hman tûr Bible an lo duh chho ta a. Tichuan, Hebrai ățawnga ziah Hebrai Bible chu Grik ățawnga letin Thuthlung Hlui an nei ta a. Chu chu *Septuagint* tia hriat lâr a ni. Hei hi Lal Isua pian hma kum BC 250-200 vêla lâk khâwm ățan tawh nia ngaih a ni. Amaherawhchu, tûna Hebrai Bible nê n hi chuan a bu chhûng thu lamah te, bu awm zât te leh bu indawt dân lamah te a inang lêm lo. Zâwlnei Lekhahute leh Thuziakte chu a hrana thliar lovin an thu ken azirin an thliar mai niin a lang.

(4) *Juda Rabbi-te Bible (Thuthlung Hlui):* Thuthlung Hlui bute Pathian thua pawm a nih chungchângah Juda sakhaw hruaitu (Rabbi)-te an pawimawh hle. Hun rei tak ÷awngkaa an inhlan chhâwn leh ziaka dah te chu an vawng ÷ha zêl a. Juda-te tihdarha an awm hnu pawhin Jerusalem leh a chhehvêla awm Rabbi-te chuan Thuthlung Hlui bute chu lo vawng ÷hain inhnia na tam tak kârah an pi leh pu a ÷anga Pathian lehkhabu thianghlina an lo pawmte chauw chu Bible-ah ngaiin an vawng ÷ha a. Chûng an tehaah chuan zâwneite hun laia zia k te, Israel hruaitu ropui - zâwneite, lal leh puithiamte thuziak te chu thuneihna sâng tak nei a ni tih hriain tûna Bible-a kan neih bu 39, Hebrai Bible tia an sawi ÷hin te chu ÷ha takin an lo vawng a. Kum AD 90 vêlah khân Jamnia khuua inkhâwmpuia h Bible-a an lo pawm bu 39-te chu Pathian thu nung, rinna leh thiltih teha atâna ÷ha tâwkah ngaiin Pathian Lehkhabu Thianghlina an pawm ta a ni.

(5) *Kristian hmasate Thuthlung Hlui:* Kristian hmasate Thuthlung Hlui hi Hebrai Bible kan tih tak nêh khân kawng nhihin a danglam a: (a) Juda-te Bible pawm zawng zawngte chu pawm kim vek ni mah se, tlai khawhnu deuhva zia k te pawh belh tel a ni a. Chûng chu ‘Apokrifa’ an tih tâk te kha a ni. (b) Lehkhabu indawt dânah Kristiante Thuthlung Hlui leh Hebrai Bible hi a inang lo baw k. Hebrai Bible-ah chuan Chronicles bu hi a tâwp berah a awm a. Kristian hmasate Thuthlung Hluiah chuan Grik leh Latin ÷awng lehlin rem khâwm zuiin zâwneite tete chuan hnung an dâw l a ni.

Kum AD zabi 4-na tâwp lamah chuan khawthlang lam Kohhran, Roman Catholic lo ni tate chuan Thuthlung Hlui bu zîngah Apokrifa dah telin Alexandria-a Juda-ten Thuthlung Hluia an lo pawm chu an chhawm zêl a. Grik leh Latin ÷awng lehlin lo awm tawhte chu chawi nung zêlin Trent Inkhâwmpui (1545-1563)-ah Thuthlung Hlui bu 39 bâkah Apokrifa bute chu an pawm tel thu an nemghet ta a ni. Kohhran a lo in ÷hena (1054)

Khawchhak Kohhran, Orthodox Kohhran tia sawi tâk pawhin Hebrai Bible bâkah thuziak dang, apokrifa bute hi kohhran tihchakna lehkhabu tiin Bible-ah an behtîr a. Chutih rualin hêng kohhran pahnihte hian Hebrai Bible-bu 39-te bâka belh chhah, apokrifa bute hi bu dang 39-te ang diak diak chuan an pawm bîk lo va. A hmingah pawh Pathian thua pawm hlâwm hnihna (deutero canonical books) tiin an vuah a ni.

(6) *Siamṭhat Kohhrante Bible (Thuthlung Hlui):* Kum AD zabi 16-a Siamṭhatna a lo thlena kohhran a lo phel tâkah chuan Pathian thu leh thurin hriat thiam dân te, Pathian leh mihring inlaichînna hriat thiam dân te a lo hrang ta a, Bible-a lehkhabu pawm chin pawh a inang ta lo. Siamṭhat Kohhran hnârkaitu ber, Martin Luther-a hma pawh khân Roman Catholic Kohhran kalphung leh Bible chungchânga an thu kalpui dân dod Itu an lo awm nual tawh a ni.

Siamṭhatna a lo chhuah hmaa Bible pawm dân (canon) chungchânga rawtna thar rawn siamtu chu John Wycliffe-a a ni. Ani hian kum AD 1382 khân Thuthlung Hlui bu 39 a lo chhuah tawh a. Martin Luther-a chuan Bible pawm dân thlîrna bung thar a rawn tichhuak ta a. Hei hi kum 1519-a J. Maier of Eck (Mei-ar of ek) an tih nê Roman Catholic rin dân kan faina thurin (purgatory) chungchânga an inhniálna aṅanga ṭan a ni deuh ber. Roman Catholic kohhran chuan kan faina thurin (purgatory) atâna an Bible ṭan chhan chu 2 Makabia 12:46 a ni a. Hemi vâng hian Luther-a chuan 2 Makabia chu a hnâwl ngâh ta nghe nghe a ni. Kum 1534-a German ṭawnga Bible a tihchhuahah chuan Judithi, Solomona Thufing, Tobita, Siraka, 1&2 Makabia, Baruka, Estheri leh Daniela thu belhte chu Apokrifa tiin a thliar hrang a, “Pathian lehkhabu dangte tluk pha chia lo; amaherawhchu, chhiar atâna ṭha leh ṭangkaite,” tiin a sawi.

Hetiang Luther-a pawm dân hian Siamthat Kohhrante pawm dân chu a nghawng chho ta zêl a ni. Siamthatna hnârkaitu thenkhatte chuan kum sâng khat chuang kohhranin a lo hman tawh Apokrifa paih thlâk tawp chu an duh bik lo va. Pawm dân (canon) hlâwm thennaah ‘Hlâwm Hnihna’ tiin Bible-ah an telh ta chauh hlawm a; Bible bu tâwp lamah an dah ta thîn a ni. Hetih rual hian kohhran thupuan (confession) hrang hrangah Apokrifa bute hnâwlina a ri ring chho tial tial a. Pâwl pakhat *Puritan* an tih pheï chuan an thurin hrilhfiahnaah chuan Apokrifa-te hi sakhaw bu ni lovin khawvêl lehkhabute ang maiin a chhuah a. Presbyterian Church of India inngahna thurin pawimawh Westminster Confession (1648) chuan Apokrifa bute chu Pathian thâwk khum ni lo, mihringte lehkhia ziak pângngai ang mai a nih thu leh kohhrana hman tlâk a nih loh thu a sawi bawk.

Kum 1825 hma lam kha chuan Apokrifa bute hi Bible-ah chhut tel a ni thîn a. Sâp tawng Bible lamah pawh dah tel a ni thîn. Kum 1825 khân Edinburgh-a British and Foreign Bible Society (BFBS) Committee chuan Apokrifa bute hi lehlin pawh lehlin tawh loh tûrin thu a titlu ta a. May 3, 1827 aţang chuan BFBS chuan Apokrifa tel lovin Bible an chhu ţan ta a ni. Amaherawhchu, khawvêl thiamna sâng zêlah hian Bible zirna lamah pawh Apokrifa bute pawimawhzia zir tel a ni a, a bik takin Juda-te chanchin leh Thuthlung Hlui leh Thuthlung Thar inkâr chanchin zirnaah pheï chuan leklam ber zînga mi a ni hial a ni. Kohhran inpumkhatna lama ke kan pên chhoh zêl tâkah hian tûn hma anga Apokrifa do burna rilru pawh kan paih thla ta viau a. Kan Synod pawh hian Apokrifa bu hi chhui zau nân a ţangkai tih hriain a hranpain a chhuah ve ta a ni.

5. Bible atâna Thuthlung Hlui pawm a nih dân

Kohhran thu chhuak mumal tak aţanga Thuthlung Hluia lehkhabu pawm tûr sawi hmasakna ber chu Rom Inkhâwmpui (AD 382)-ah a ni a. Hetah hian tûna kan pawm lehkhabu 39-te

hi a tel vek nia hriat a ni a. Apokrifa kan tih ațangin Siraka (Ecclesiasticus), Tobita, Judithi, 1&2 Makkabia te pawh telh an ni. Kum AD 397-ah Carthage Inkhâwmpui an neihah chuan Thuthlung Hlui lehkhahua pawm tûrte puan a ni a. Hetah pawh hian tûna kan Thuthlung Hlui bute bâkah Apokrifa kan tih bu 6 an telh leh a; chûngte chu: Tobita, Judithi, Solomona Finna, Siraka leh 1&2 Makkabia. Kum AD 405-ah Jerome-a Vulgate lehlin chu tihchhuah a ni a. Hetah hian Thuthlung Hlui lehkhahu 46 lai pawm a ni a. Hei hi Roman Catholic Bible kan tih hi a ni ta ber a ni.

Juda-te ngaih dânah chuan an Bible pawm fel a nih hun hi hun thum awm theiin an ring: (a) Kum AD 90-120 bâwr vêl laia thu ziah pakhat 4 Ezra-ah chuan Pathianin Ezra kha lehkhahu thianghlim 24 chungchâng a lo hrih diam tawh angin a ziak. Chuvângin, Ezra hun hnu lama mi chu Bible-a pawm theih loh niin an ngai. (b) Ngaih dân dang lehah chuan Ezra țahnemngaihna țawmpuitute nia sawi, kum BC zabi 4-na vêla Sunagog lian an tih member-ten ngun taka ngaihtuahin thutlûkna an siam ta niin an sawi. (c) Ngaih dân tlânglâwn tak leh rinawm tak pakhat chu Jamnia Inkhâwmpuia pawm nia rinna hi a ni. Jamnia hi Mediterranean Tuipui kam, Jerusalem khaw thlang lama awm a ni a. Hetah hian Juda-te zirna sikul pawimawh tak din a ni a, chumi lo țang lian zêl chu Sanhedrin hmunpui a lo ni ta a. Kum AD 90-100-ah chuan he hmunah hian Rabbi-te Inkhâwmpui awmin, chuta kalte chuan tûna kan neih ták bu 39, Thuthlung Hlui, Hebrai Bible tia sawi bawh hi an pawm fel ta a. Hei hi Siamțhat Kohhrante chuan Bible-a kan pawm ták hi a ni.

6. Thuthung Thar lo pian chhuah dân

Isua Krista hun lai leh a zirtûrte hun lai thleng khân an Bible chu Hebrai Bible, a bîk takin Grik țawng Bible kha a ni a. Chhuan hnih khat a liam hnu chuan anmahni pualin zirtûrna leh

infuihna te, Isua Krista leh a rawngbâwlna chanchin an hriat ang te ziaikin kohhran châwm nân an hmang thîn a. Hun a kal zêl a, Kristian zirtîrna laimu a nih vânga roh taka humhemin, kohhrante zirtîr nân an hmang ta zêl a ni. Tichuan, Isua Kristaa thu thlun thar ziahna, Lehkhabu Thianghlim a lo piang ta a ni.

Lal Isua vâna a lâwn tâk hnu chuan a thuhiril te chu an ngaihhlut leh an serh êm êm Hebrai Bible-a Pathian thu ang chiaha thunei a ni tih an hria a. Juda-ten Messia an beisei thîn dân zawng zawng rawn khûmin Isua chu Pathian fapa a nihzia an hmu fiah zêl a. Chu chuan a chanchin an hriat ang angte chu ziaik lo thei lovin a siam a ni. Isua thih hnu, apostol-te kuta Chanchin Th̄a a awm hnu pawh khân apostol-te kaihhruaiin kohhran tiak tîr chu a awm zêl a. Anni pawh chuan a tîrah chuan Isua chanchin an ziaik mai lo. Isua chu lo kal leh mai tûra an ngaih vâng pawh a ni ang. Hun a lo kal deuh a, Isua zirtîrte thuhiril chu an sawi darh zêl a. An Lalpa chanchin chu ziaik ngeia dah tûlin an hre ta a. Matthaia, Marka, Luka leh Johana te chuan fimkhur takin Isua Chanchin Th̄a chu ziaikin an dah ta a. Anni bâkah, Paulan thahnemngai taka ringtute fuihna leh kohhranho awm dân tûr a zirtîrna lekhathawnte chu an vawng th̄a zêl a. Kohhran hmasa tân rohlu a tling ta a ni. Kohhran lo th̄ang zêl chuan Pathian thu nung, Thlarauva chênchilh leh thâwk khum a nihzia an hre Chiang zêl a. Hêng thuziakte hi kohhranho humhim nân leh fuih nân te, rinna inzirtîr nân te a lo th̄angkai ta êm êm a ni.

7. Eng lehkhabute nge pawm tûr

Chutianga chanchin an hriatte an ziah thlâk zêl tâkah leh Apostol-te hming hawh pawha lekhathawnte ziah a lo tam tâkah chuan eng ber nge rin tlâka pawm tûr ni ang tih then hran a lo ngai ta a. Chumi then nân chuan tehfung hlâwm lian pali an nei. Chûngte chu—

(1) *Apostolte ațanga chhuak:* Tehfung pakhatnaah chuan lehkha ziaak rêng rêng kha Lal Isua zirtîr, Apostol-te ațanga chhuak ngei, an thu sawi ziah thlâk emaw, Apostol-te nêna inzawmna nei ngei emaw a ni tûr a ni.

(2) *Lehkhathawn dawngtu kohhrante leh Apostol-te inzawmna:* Apostol-te emaw, an hminga ziaktute an lehkhathawn ziah chhan nia lang kohhran/khâwmpui emaw, an lehkhathawn vawng him thatute nêna Apostol-te inlaichîna/inzawmna emaw chu tehfung pakhat anga ngaih a ni leh a.

(3) *Rinna nêna inmil:* Apostol-te zirtîrna thurochhiah, an rinna leh kohhran tih dân kalphung nêna inmil ngei chu tehfungah hman leh a ni. Zirtîrna dik lo a hluar hle a, an lo pawm dân leh inzirtîr dân nêna inkalh a nih chuan chu lehkhathawn chu pawm a ni ngai lo. Entîr nân, Petera chanchin ța (Gospel of Peter) tih lehkhabu pawh zirtîrna dik lo chi khat Docetism rinna nêna inzawm a nih avângin an hnâwl ta a ni.

(4) *Huapzo leh kohhran nemngheh:* Lehkha thawn thenkhatte kha kohhran mal bîk tâna ziah an ni ngei a; amaherawhchu, an thu ken kha mi tin huap zirtîrna ța leh rinna châwm thei an ni tûr a ni. Kohhranten an lo hman tawh leh kohhran hrang hrangten an lo pawm tlân leh nemngheh a ni tûr a ni.

8. Bible pawm fel

Kohhran hrang hrang huap inkhâwmpui hmasa Council of Nicaea (325 CE) khân zirtîrna dik lo an khel a, Bible pawm fel chungchâng erawh an rêl fel lêm lo. AD 363-364 khân Council of Laodicea (Laudisia) -ah Thuthlung Hlui bu 22 (Hebrai Bible leh Apokrif a bu thenkhat) leh Thuthlung Thar bu 26 (Thupuan bu tel lovin) an pawm nia sawi a ni a. AD 393-a Council of Hippo-ah chuan Kristiante Bible pawm tûr tihchhuah a ni a. Thuthlung Thar lam bu 27 kan neih ang hi pawm niin Thuthlung Hlui lamah Roman Catholic kohhran pawm dân ang hi nemngheh

a ni. Kum AD 397-a Council of Carthage (Karthés)-ah chuan thu khauh tak tichhuakin kohhran huang chhûngah eng lehkhabu dang mah chhiar phal a ni lo an ti hial a. Hêng inkhâwmpui pahnihte hi kohhranin Bible-a lehkhabu pawm tûr a rêl fêlna leh a nemnghehnaa ngaih a ni ta a ni.

Thuthlung Hlui lam hi tûna kan pawm dân a lo pianna chu Reformation kha a ni a. Martin Luther-a chuan Thuthlung Thar bute zînga bu thenkhat chu dah hniam deuh a nei na a, Bible-a lehkhabu 66-te chu Pathian Lehkhabu chungnung bîkah a ngai a, Apokrifa te erawh chu hnuaihngung deuh zâwkah a dah a. Roman Catholic Kohhran lamin an dinhmun sawh ngheh nân kum 1546 khân Council of Trent-ah chuan Latin Vulgate zuiin tûna an neih dân hi an nemnghet ta a. Siamṭhat Kohhran intêl khâwmin kum 1647 khân Westminster khuaah inkhâwmpui an ko va. He inkhâwmpuiah hian Apokrifa chu Bible-ah telh tûr a ni lo tiin an dinhmun an tichiang ve leh ta bawk a ni.

9. Tlângkawmna

Bible kan neih chhoh dân kawng hi a thui êm êm a; ziah a nih dân te, lâk khâwm a nih dân te, bo thlau leh chhe mai lova vawn ṭhat tlat a nih dân te, ziah chhâwn a nih zêl dân te, a tâwpa kohhranin pawm chin tûr an thliar dân te hi sawi kim sên a ni lo. Hêng zawng zawng hi Pathian Thlarau Thianghlim kaihhruaina tel lo chuan thil awm thei a ni lo kan ti thei ang. Bible-a pawm fel a nih theihna tûra kohhran puipaten theitâwp chhuaha uluk taka an thliar dân te hi a ropui hle a ni. Bible-a kan pawm lehkhabute chungchângah kohhran hlâwm lian pathum, Roman Catholic, Orthodox leh Siamṭhat Kohhrante inang lo hret mah ila, kan zavaia kan pawm tân chu Thuthlung Hlui bu 39 leh Thuthlung Thar bu 27-te hi a ni. Pathian thâwk khum, Lehkhabu Thianghlim a nihna tûra amah zuitute kal tlanga min pêk Bible lo pian chhuah dân hian lehkhabu danglam bîk, thu nung a nihzia hi a tichiang hle a ni.

BIBLE – PATHIAN THU NUNG**THEN II-NA****Pathian thu nung a ni****1. Thuhmahruai**

Chawhma lamah khân Bible lo pian chhuah dân leh Pathian thua pawm a nih dân te kan zir tawh a. Chawhnu lamah hi chuan Bible hi Pathian thu nung a nih dân kan zir ve thung dân a ni. Bible hi hmânlai mite thuziak lâwr khâwm, wawiin thlenga kan la wawn that zêl a ni satliah mai lo va, Pathian thu tak inziahna bu a ni. Pathian thu nung a nih thu hi Bible vêk hian min hrilh a. Thuthlung Tharah ngawt pawh hian ‘Pathian thu’ tih vawi 39 zet a chuang a ni. Pathian thu, Bible hi thu nung leh thiltithe i a nihzia kan hmu tam hle (Mt 4:4; Jn 14:26; 2 Tim 3:16; Heb 4:12; Jak 1:22; 1 Pet 1:23; 2 Pet 1:3-4).

India Ram Presbyterian Kohhran Thurin I-na chuan, “Thuthlung Hlui leh Thuthlung Thar Bute hi Pathian Thu a ni a, hêng chauh hi rinna leh thiltih tehna dik lo thei lo a ni,” tiin kan Bible hi Pathian thu a nihzia a nemnghet a. Kan kohhranin Bible a pawm dân hi khawvêl ram danga kohhran ziding pângngai pawhin an pawm dân a ni tlângpui. Kan rinna leh thiltih tehna dik lo thei lo a nihna hi kan hriat nawn fo a pawimawh a ni.

Tirhkoh Paula chuan Pathian Lehkha Thu zawng zawng hi Pathian thâwk khuma pêk a nih avânga Pathian thu a nih thu min hrilh a (2 Tim 3:16). Bible hi Pathian thu nung a nih tih Chiang taka min hrilhtu chu Hebrai Lehkathawn a ni. Hebrai 4:12-ah chuan, “Pathian thu hi a nung a, thil a ti thei a, khandaih hriam tawn eng ang ai pawhin a hriam a, nunna leh thlarau,

ruhtuah leh thlîng phel hrang khawp hialin a chhun thei a, thinlunga ngaihtuah leh tumte hi a hre nghâl thei a ni,” tih kan hmu.

2. Bible hi Pathian thu nung a ni

Pathian leh a thu hi thliar hran theih a ni lo va. Kan Pathian hi mi nung a nih vângin a thu pawh hi thu nung a ni. Zâwlnei Isaia chuan, “Hlobet chu a vuai a, a pâw chu a chuai thîh; kan Pathian thu erawh chu chatuanin a awm reng,” a ti (Is 40:8). Pathian chu chatuan atâna mi nung a nih avângin a thu pawh hi chatuan thu nung a ni a; thil dang zawng zawng an ral hunah pawh kan Pathian thu hi chu a nung reng dâwn a ni.

Hebrai Lehkathawn ziaktu hian Pathian thu thiltihtheihzia a sawi zînga a chhawp chhuah hmasak ber chu, “Pathian thu chu a nung a,” (Heb 4:12) tih hi a ni a. A ‘nung’ tih sawina atâna a ÷awngkam hman hi Grik ÷awng chuan thil nung mêk sawina a ni. Bible-ah hian chi nung a awm a ni mai lo va, thu nung mêk, nung reng leh rah chhuah mêk chu a awm a ni.

Pathian thu hi sual kawnga tlu tawh, mahnia nunna nei tawh lote tinunga, nunna petu a ni a (Eph 2:1-2). Petera chuan, “Chi chhe thei lakah ni lovin, Pathian thu nung reng leh awm rengah chuan, chi chhe thei lo laka piang thar in ni zâwk si a,” tiin a sawi a (1 Pet 1:23). Jakoba pawhin, “A thilsiamte hmahruaitu ang kan lo nih theih nân, ama duh zâwngin thutak lakah chuan min hring a ni,” tiin a sawi baw (Jak 1:18).

Mihringin Pathian aw kan hriat theihna chu Bible hi a ni. Pathian hming la hre lo leh a thu âwih lote ringtua siam tûr chuan Bible hi kan hriatfîr a ngai a. Bible ziaa a nih chhan chu nun kan neihna tûr a ni a. Johana chuan, “Hêng hi Isua chu Krista, Pathian Fapa a ni tih in rinna tûr leh, in rina, a hminga nun in neihna tûrin ziaa a ni,” tiin a lo sawi nghe nghe a ni (Jn 20:31). Bible hi thu nung a nih avângin khawi hmunah pawh,

eng hunah pawh a nung reng a. Kan rawngbâwltuten Pathian thu an hrilna hmunah a takin a lang chhuak thîn a ni.

Bible chu Chanchin Ṭha hrilna hmanraw hriam ber a ni a. ringtua mite siamtu thu nung a ni. Chutiang bawkin rinna kawng zawha, rawngbâwlina kal mêkte nun tinung a, chakna petu pawh Pathian thu tho hi a ni a. Ringtu zawng zawngte hian chauh châng ni leh ro deuh hunte kan tawng thîn a. Chutih hunah chuan Pathian thu hi kan nun tinung thartu a ni thîn. Lal Davida chuan:

LALPA dân chu a ṭha famkim a, nunna a siam ṭha thîn;
LALPA thuhriattîr chu a rinawm a, mi mâwl a tifing thîn.

tiin a sawi (Sam 19:7). Pathian thu nung Bible-a inziakte hi kan tân a hlu êm êm a, tuihâlin tuithâwla mi tui a intulh bawrh bawrh a, a lo harh leh thîn angin, thlarau nuna rilṭâm leh tuihâlte tân Bible hi kan thlarau nun tinungtu, thu nung leh thiltithe i a ni.

3. Pathian thu chuan thil a ti thei

Bible hi thu nung a nih vângin thil a ti thei (Heb 4:12) tih hi kan chhiahchhiah leh tûr chu a ni. Hebrai ziaktuin, “Thil a ti thei,” tih sawi nân Grik ṭawng *energes* tih a hmang a. He ṭawngkam hi sâp ṭawnga ‘thahrui’ (energy) tih lo chhuahna bul pawh a ni âwm e. A awmzia chu Pathian thu hi thahrui chak tak ang a ni a; a nung a, a che reng a, thil tih a nei thîn tihna a ni. Pathian thu hi Pathian kê aṭanga lo chhuak a nih avângin Pathian duh zâwng a tihlawhtling thîn a ni. Isaia 55:10-11 thuah chuan, “Ruah leh vûr chu vân aṭangin a sûr thîn a, khi lamah khian a kîr leh ngai lo va, lei hi a châwm zâwk a, thil a ṭotûrin a chawrtîr a, buh chi thehtu hnênah buh chi a pe a, eitu hnênah ei tûr a pe thîn; chutiang bawkin ka kê aṭanga ka thuchhuak chu a awm ang; eng mah tih nei lovin ka hnênah a kîr leh lo vang a, ka duh ang chu a ti zo zâwk ang a, thil ti tûra ka tirhnaah chuan a hlawhtling baw ang,” tih kan hmu a ni.

Kan huan leh kan lova thlaite leh thingte hi nunna nei an nih avângin an ðang a, an hnahte a lo chawr a, a tla kawlh a, an pâr a, rah an chhuah ðîn tih kan hria a. Hetianga an awm theih chhan chu vân aţanga rawn sôr ðîn ruah tuiin a châwm vâng a ni. Ruah tui hi leia to nunna nei thil nung tinrêngte ðan lentîr a, rah chhuahtîrtu a nih ang hian Pathian thu pawh hi ringtute châwmtu leh thiltitheia siamtu malsâwm ruah a ni a. Kan rawngbâwlna pêng tinrêngin rah a chhuah theih nân Pathian thu hi a pawimawh a ni.

Chanchinbu leh television aţanga kan thil hmuh leh chhiarte aţang hian hriat tûr pawimawh thu ða tam tak kan dawng ðîn a. Thawnthu phuah thiam takin a ziaak thawnthu bute chu ngaihnawm ti takin kan chhiar a, a thawnthu khawvêlah pawh min chêtîr thei hial ðîn a. Hla phuah thiamte thu leh hlaah hian thui tak chu a chên ve theih bawk. Nimahsela, hetianga thil hrang hrang aţanga thu leh hla kan dawnte hi chu thu nung, thiltitheihna nei an nih loh avângin min chhandam thei lo va, chatuan nunna min pe thei hek lo. Pathian thu erawh chu chatuan Pathian kê aţanga chhuak a nih avângin min chhandam tûrin thil a ti thei a ni.

Bible hi thuziak ða satliah a ni ringawt lo va, Thlarau Thianghlim nemngeh thlarau lam chaw a ni. Miin Thlarau Thianghlim ðanpuina nêna a chhiar chuan nunna kawng a lo hmuh phah ðîn. Billy Graham-a chuan, “Lehkhabu ðenkhat chuan hriat zauna min pe a, ðenkhat dang chuan nun siam ðatna mi pe ve thei a, Pathian thu erawh chuan nun thlâk danglamna min siamsak thei a ni,” tiin Pathian thu chu thu nung, thiltitheia nihzia a sawi a ni. Bible thute hi a hlui thei lo va, a pawimawh ngaiin a pawimawh reng a ni. Pathian thu hi a chak a, thil a ti thei a. Bible chhiartu leh pawm tlattute nun chu thlâk danglamin a awm ðîn a ni.

4. Pathian thu chu râlthuam a ni

Pathian thu chu thu nung, thiltitheï a nih bâkah ‘khandaih hriam tawn eng ang ai pawha hriam’ a ni (Heb 4:12). Khandaih hi hmânlai chuan râl dona hmanraw hlauhawm ber a ni a, khandaih hriam tawn ngat pheï chu râl dona hmanraw hlauhawm ber a ni ngeï ang. Rom sipai râl do mi, râl hrât tak takte khân khandaih hi indona hmanruaah an hmang thîn a. Khandaih hriam tawn chu a tlâng lehlam lehlam hriam sawina a ni. Chu hriamhrei hlauhawm tak chu Pathian thu tehkhin nân Hebraï Lehkathawn ziaktu hian a hmang a. Chutiang khandaih hriam tawn ai chuan Pathian thu hi a hriam zâwk tih a sawi a ni.

Bible thiltitheihna sawi fiah nâna khandaih hriam tawn a hman chhan nia lang chu chhûngril lam a luh thûk theihzia sawina niin a lang. Khandaih hriam tawn chu thil sah nân a tângkai hle ang bawkin thil vih nân leh chan darh nân a tângkai hle ang. Bible pawh hian mihring nun a tikeh sawm mai ni lovin chhûngril nun a khawih a, nunna leh thlarau, ruhtuah leh thlîng a chhun tlang theï a ni.

Ringtute chu râl do mêk kan ni a. Kan râlthuam tha leh hlauhawm ber chu Bible hi a ni. Kan ram ei chhe mêktu eirûkna leh hlemhlêna kan dona kawngah te, zu leh ruihhlo hman sual laka kan invênna kawngah te, nun pawlawhna kan mausâm a, thlarau nun inthlahdahna leh dalna laka kan invênna tûr pawhin Bible hi thu nung, thiltitheï leh hriam tak a nih avângin râlthuama kan hman tlat a pawimawh a ni.

Setana lalram thiata Pathian ram din tûra kan beihnaah pawh Bible aia râlthuam chak zâwk leh thawk na zâwk a awm theï lo. Bible chuan kan thlen phâk loh leh kan luh theih aia thûk zâwkin mi nun a luhchilh theï a. Zalên taka kan luh theih lohna hmun, Communist kulhpui emaw, Hindu kulhpui emaw pawh ni se, a luh chhuak theï vek a ni. Mi sual ber thinlung a

siam ƣa thei a, mi luhlul leh rilru khawng bera ngaihte pawh a hneh tawh ƣhîn a ni. Zâwlnei Jeremia hnêna Pathian thu lo thleng khân a lo sawi fiah hle: “Ka thu chu mei ang, tuboh, lung chhut sawmna ang a ni lo vem ni?” (Jer 23:29) tiin Pathian thu thiltihtheihzia a lo sawi tawh a ni.

Khawvêl hmasâwn zêlah hian innghahna tlâk nia lang finna te, thiamna te, ruahmanna chi hrang hrangte a pung zêl a. Bible zirtîrna leh kaihhruaina ngainêptu kan pung chho zêl dâwn niin a lang bawk. Nun kaihhruaina atâna Bible pawimawhna hi kan sawi tlêm tial tial bawk. Chuvângin, Bible zirtîrna hi râltuam ƣa ber, sual leh a chakna hnehna a nihzia kan sawi tam a pawimawh. Khawvêl sualna lo pung zêl laka kan him nân pawh Bible hi râltuam a ni tih kan hre reng tûr a ni a. Pathian thu hi râltuam hlauhawm ber a ni a, a aia chak zâwk emaw, rin tlâk zâwk emaw a awm thei lo a ni.

5. Pathian thu nung chuan a thliar hrang thei

Pathian thu nung thiltihtheihzia lo lanna dang leh pakhat chu dik leh dik lo thliar hran theihna a nei hi a ni. Khandaih hriam ber hmangin nunna leh thlarau, ruhtuah leh thlîng hi phel hran tum ila, kan thei lo vang. Nimahsela, Bible, Pathian thu nung chuan, “Nunna leh thlarau, ruhtuah leh thlîng phel hrang khawp hialin a chhun thei,” tiin a sawi (Heb 4:12).

Tûnlai hian mi ƣenkhat chuan taksa, rilru leh thlarau hi thliar hran theih niin an sawi ƣhîn a. Kan taksa thiltih chuan kan thlarau nun a khawih pawh zo lo ti hialin an zirtîr ƣhîn. Chu chu Bible-in min zirtîr dân niin a lang lo. Taksa leh thlarau, ruhtuah leh thlîng phel hran hi Pathian thu, Bible thiltihtheihzia sawina ƣawngkam a ni. Pathian thu nung thiltihtheihzia sawina a ni a, khandaih hriam ber ai pawhin Pathian thu hi a hriam zâwk tih thu sawi fiahna a ni.

Kan chênna khawvêl hi engkim inchiahpiahna khawvêl a ni ber tawh a. Thil dik leh dik lo thliar hnan a harsa ta ang bawkin, mi tha leh tha lo te hi thiar thiam a harsa tawh tak zet a ni. Pathian thu erawh chuan a tak leh a lem a thliar a, thil tha leh tha lo thliarin chatuan nunna kawng a tifiaw a, nunna kawng aţangin fiaw takin thihna kawng a thliar hrang a ni. Kan kohhran pastor, rin dang nei thîn Kristiana inlet pakhat chuan Bible a chhiar aţanga nunna kawng a zawh tâk thu sawiin, “Bible ka chhiar aţang hian Isua hi tu nge a nih ka hre chiang ta a, ka Chhandamtuah ka vuan ta a ni,” tiin a sawi.

Kum 2020 hi khawvêl pumah Covid-19 hri lêng avângin kan buai hle a. Khawvêl hian kan zawh ngai loh kawng kan zawh a; kan hma lam hun pawh kan ngaihtuah thiam ta meuh lo. Mi thiamte leh chinchâng hre zâwkte chuan nunphung thara nung tûrin min chah châmchi a. Kan tih dân thîn pângngai ti thei lovin rei tak kan awm a, kan hma lamah eng thil nge lo thleng dâwn kan hre hek lo. Engtin nge khawvêl hi a kal zêl ang tih ngaihtuah hian kal dân tûr hmuh thiam a har hle.

Hetianga hun harsa leh hun pik kan tawh lai te, kan chiai lai leh kan rilruin âr bo a zawn mêk lai hian Pathian thu nung hi kan tân a pawimawh zual a ni. Zawh ngai loh kawng kan zawh lai ngei pawha kawng dika min hruaitu chu thu nung, Bible hi a ni. Sam ziaktu chuan—

I thu hi ka ke atâte hian khâwnvâr a ni a,
Ka kawng atan êng a ni (Sam 119:105)

tiin a sawi a ni.

Ringtute hian kan kal zêlna tûrah dik leh dik lo te, tha leh tha lo chungchângah te hian thu inchuh leh inhniaalna kan nei reng dâwn a. Finna leh thiamna lamah kan sâng ve ta hle a. Kan chhehvêla mite sakhaw biak leh an nun dân pawhin min chîm

thûk ta viau mai. Sakhaw dang nêna kan nun hona leh kan inzâr zawmna kawngah pawh tih tûr chin leh inhung a tûlna chin kan hriat theih nân, min kaihruaitu thu nung, Bible hi kan bih ngun a tûl hle dâwn a ni. Awm dân dik leh t̄ha hriat nân te, tih tûr dik leh t̄ha hriat nân te, sawi tûr dik hriat nân te Bible hi kaihruaitu t̄ha ber a ni.

6. Pathian thu aţangin engkim a lang fiah

Pathian thu thiltihtheihna kan hmuh pawimawh tak chu kan ngaihtuahna leh kan tumte a hre hrang thei hi a ni. “Thinlunga ngaihtuah leh tumte hi a hre nghâl thei a ni,” tih a ni (Heb 4:12). ‘Hre nghâl thei’ tih sawi nân hian Grik tawng *kritikos* tih hman a ni a. A dik leh dik lo hre tûra uluk taka phelh darha, leipse hnua a dik leh dik loh chungchânga thutlûkna siam a kâwk a ni. Pathian thu chuan kan rilru ngaihtuahna hi a dik leh dik loh ngun takin a thlîr a, kan ngaihtuahna leh kan tumte hi a hria a ni. Davida chuan—

Aw LALPA, nangin ngun takin mi en chhuak a, mi hre ta.
Nangin ka t̄hut leh ka din hi i hre t̄hîn a,
Ka ngaihtuahna hi hla tak aţang pawhin i hre thiam t̄hîn
(Sam 139:1-2)

tiin Pathianin a hriat chianzia a sawi a ni. Siamt̄hat Kohhran kalphung duang chhuaktu John Calvin-a chuan, “Pathian thuin a hriat phâk loh leh a khawih phâk loh khawpa thinlung sak, nghet leh biru mihringah a awm lo,” tiin a sawi a ni.

Mizo Kristiante hian Bible hi kan duhin kan ngaina hle a. Bible Society rawngbâwlinaah pawh hian kan thawh hlâwkin India rama a ti t̄ha ber kan hauh ngar ngar a ni ber a. Hetia Bible siam chhuah leh sem darh kawnga kan beih mêk bâkah Pathian thu zirna hmunah pawh kan nula leh tlangvâl chhuanawm tak takte chuan hun puma rawngbâwl tûra inpein Bible an zir a. Bible zirna hmun luhchilh thei lo zîngah pawh

Bible ngainaa zir peih tak tak kan awm ðeuh mai. Bible bu pum chhiar chhuak mi tam tak an awm tawh a, wawi za chuang chhiar chhuak tawhte pawh kan nei nawk a ni! A chhiara chhiar mai duh tâwk lo va, a ziaha ziaak chhuakte pawh hi kohhran tinah hian an awm nual bawk.

Hetianga Bible kan ngainat a, kan buaipui êm êm lai hian Bible hi Pathian thu nung, kan nun kaihruaia siam ðathu a nih hi kan hriat thar a pawimawh a. Thuhriltu ropui D.L. Moody-a khân, “Kan hriatna tizau tûrin Bible hi pêk kan ni lo va, kan nun thlâk danglam tûra pêk kan ni zâwk,” tiin a sawi. A sawi dik hle mai. Bible hian a ðha zâwnga kan nun a tihdanglam a pawimawh a ni. Kan kohhran thurinin a sawi angin, “Kan rinna leh thiltih tehna sâng ber,” a nihna hi kan hriat nawn fo a pawimawh a ni.

Hebrai ziaktuin, “Thinlunga ngaihtuah leh tum,” tia a sawi hi a ðha lam chauh ni lovin, a ðha lo leh Pathian dona lam pawh a sawi tel bawk niin a lang. Kan ngaihtuahna dik lo leh fel lo zawng zawng hi sawi chhuak kher lo mah ila, kan chhûngril bera a tawm lai pawhin, Pathian thu chuan a hmu vek a ni. Pathian hmaah chuan engkim hi a lang sa vek a. “Kan chanchin kan thlenna tûra mit hmuhah chuan, engkim saruak leh inhawng sain a awm zâwk a ni,” tih a nih kha (Heb 4:13).

Mihringte hi kan chên hova, kan thawh ho tam chuan kan ngaihtuahna leh kan rilru kan inhriatpui thui viau chuan a lang a. Nimahsela, kan ngaihtuahna chhûngril ber leh kan tumte hi chu kan inhriatpui fai vek lo. Mahni ngaihtuahna ngei pawh hre Chiang tak tak lo kan ni a. Kan boruak tawn azirin kan rilru te hi a danglam a, a inthlâk zung zung mai. Mahni pawh inhre thei lo kan ni a. Pathian thu chuan kan nun chhûngril ber, kan ngaihtuahna te a hre vek a ni. Chuvângin, mahin inen fiah nân pawh Bible hi a rin tlâk a, belh chian a dâwl êm êm a ni. A rûka ngaihtuahna ðha lo leh fel lo kan put loh nân Pathian thu nung

ngei hi kan chhiar ngun tûr a ni a. Kan inen fiahna dârthlang, kawng min kawhhuhtu a ni a. Bible hi chhiar ngun ila, thu nung a nih miau avângin kan hriat fiah loh te hre fiahin nun dân tûr dik kan chhar zêl dâwn a ni.

7. Tlângkawmna

Khawvêlah lehkhabu tha tak tak, mihring nun kaihruaina atâna pawimawh tak tak a awm ve teuh mai. Amaherawhchu, hêng hian thu tha leh rin tlâk tak tak pai mah se, Pathian thu a nih loh avângin nunna min pe thei lo. Pathian Lehkhabu Thianghlim, Bible erawh chu thu nung a ni a, kawng tinrênga inngahna tlâk thu hlu a ni. Chuvângin, Bible hlutna hi kan hriat thar leh a, kan nun kaihruaitu atâna kan hman zêl hi a pawimawh hle. Khawvêl pumah Bible hi lehkhabu hralh tla ber a la ni reng hian thu nung a nihzia a târ lang Chiang hle a ni. Zofate hian Bible kan ngainain lei pawh kan lei tam hle. Bible hi dah thaavawng mai lovin kan nun kaihruaitu atân hmang ila, nasa takin chhiar ila, malsâwmna tam tak kan dawng ngei ang. Bible hi Pathian pâwl nân leh kan nun kaihruaitu atân i hmang zêl ang u. Pathian thu chu thu nung a ni si a.